

\*\*\*\*\*

प्रमुख समाचार –

- बीजापुर जिला म आज सुरक्षा बल संग होय मुठभेड़ म बारह झिन माओवादी मारे गीन-तीन झन जवान मन घलो सहीद।
- अंतर्राष्ट्रीय दिव्यांगजन दिवस म दिल्ली म आयोजित समारोह म राष्ट्रपति ह धमतरी जिला के बसंत विकास साहू ल राष्ट्रीय पुरस्कार प्रदान करीन।
- भारत अउ दक्षिण अफ्रीका के बीच रायपुर म खेले जावत एक दिवसीय क्रिकेट मैच म भारत ह पहली खेलत दक्षिण अफ्रीका ल तीन सौ उनसठ रन के लक्ष्य दीस।

माओवादी मुठभेड़

बीजापुर जिला म आज सुरक्षा बल मन संग होय मुठभेड़ म बारह झिन माओवादी मन ह मारे गीन। उहें, ए मुठभेड़ म सुरक्षा बल के तीन झन जवान मन घलो सहीद होगे हवय अउ दो झन दूसर जवान घायल होगे हे। जिला के पुलिस अधीक्षक डॉक्टर जितेन्द्र यादव ह बतईन कि बीजापुर-दंतेवाड़ा सीमा म माओवादी मनके मौजूदगी के खूफिया सूचना मिले के बाद दंतेवाड़ा अउ बीजापुर डिस्ट्रिक्ट रिजर्व गार्ड-डीआरजी, स्पेशल टॉस्क फोर्स-एसटीएफ, कोबरा अउ सीआरपीएफ के संयुक्त टीम डहार ले तलाशी अभियान चलाय जात रिहीस। इही दउरान मुठभेड़ सुरू होगे। सुरक्षा बल अउ माओवादी मनके बीच आज बिहनिया ले रूक-रूक फायरिंग जारी रिहीस। बस्तर रेंज के पुलिस महानिरीक्षक सुंदरराज पी. ह बतईन कि मउका ले अभी तक बारह झिन माओवादी मनके सव ल बरामद कर ले गेहे। एखर अलावा मउका ले रायफल अउ दूसर विस्फोटक सामग्री घलो जब्त करे गेहे। ए मुठभेड़ म तीन जवान सहीद होगे हे। उहें, दू झन दूसर जवान घायल होय हे, जेला बीजापुर म प्राथमिक उपचार के बाद खतरा ले बाहिर बताय जात हे। ए इलाका म सुरक्षा के उपरहा बल भेजे गे हवय। क्षेत्र म सर्च ऑपरेशन चलत हे।

अंतर्राष्ट्रीय दिव्यांगजन दिवस

आज अंतर्राष्ट्रीय दिव्यांगजन दिवस हवय। राष्ट्रपति द्रौपदी मुर्मु ह नई दिल्ली म आयोजित राष्ट्रीय पुरस्कार समारोह म दिव्यांगजन के सशक्तिकरण म सुधर प्रयास बर लोगन ल अउ संस्था मन ल राष्ट्रीय पुरस्कार प्रदान करीन। एमा छत्तीसगढ़ के धमतरी जिला के कुरुद निवासी बसंत विकास साहू घलो सामिल हे। श्री साहू ह उंखर असाधारण उपलब्धि अउ समाजिक योगदान बर सर्वश्रेष्ठ दिव्यांगजन श्रेणी के राष्ट्रीय पुरस्कार प्रदान करे गीस। ए मउका म राष्ट्रपति ह किहीन कि कोनों समाज ल सही अर्थ म तथे विकसित कहे जा सकत हे, जब दिव्यांग लोगन संग समान व्यवहार करे जाय। राष्ट्रपति के हाथ ले पुरस्कार पाय के बाद बसंत विकास साहू ह आकाशवाणी समाचार ले बात करत अपन खुसी जतईन।

दिव्यांग होय के बावजूद बसंत साहू ह कला अउ समाज सेवा बर अपन जीवन ल समर्पित कर दे हवय। ओमन ह पाछु सत्ताईस बछर ले अपन भुजा म ब्रश बांधके जनजातीय संस्कृति के चित्रण करत हे। अंतर्राष्ट्रीय दिव्यांगजन दिवस म आज राज्यपाल रमेन डेका ह रईपुर के सेमरिया के कोपलवाणी श्रवण बाधित विद्यालय म राखे गे कार्यक्रम म सामिल होइन। ए दउरान ओमन ह ए स्कूल ले पास होय लइका मन ल सम्मानित करीन।

अंतर्राष्ट्रीय दिव्यांगजन दिवस-02

अंतर्राष्ट्रीय दिव्यांगजन दिवस के मउका म आज सूरजपुर जिला म राखे गे राज्य स्तरीय कार्यक्रम म महिला अउ बाल विकास समाज कल्याण मंत्री लक्ष्मी राजवाड़े सामिल होइन। ए मउका म ओमन किहीन कि दिव्यांग लोगन समाज के अनमोल सक्ति हे अउ उंखर सम्मान, अधिकार, अउ समान अवसर निश्चित करना राज्य सरकार के पहिली प्राथमिकता हे।

## प्रधानमंत्री कार्यालय-सेवा तीर्थ

प्रधानमंत्री नरेन्द्र मोदी ह प्रधानमंत्री कार्यालय के नाव बदल के सेवा तीर्थ कर दे हवय। केन्द्रीय गृहमंत्री अमित शाह ह एक टिन सोशल मीडिया पोस्ट म किहीन कि राजभवन अउ राजनिवास के नाव बदल के लोकभवन अउ लोक निवास करे जावत हे। ओमन ह एला एक श्रेष्ठ अउ विकसित भारत बनाय के दिसा म बड़े मील के पत्थर बतईन।

## संचार साथी ऐप

केन्द्रीय संचार मंत्री ज्योतिरादित्य सिंधिया ह विपक्ष के जासूसी के आरोप ल खारिज करत किहीन कि संचार साथी ऐप ले जासूसी संभव नइ हे। आज लोकसभा म एक ठन प्रश्न के उत्तर देवत श्री सिंधिया ह बतईन कि उपयोग कर्ता अपन सुविधा के अनुसार पंजीकरण करके ऐप ल सक्रिय कर सकत हे अउ एखर फायदा ले सकत हे।

## मंत्रिमंडल-निर्णय

मुख्यमंत्री विष्णुदेव साय के अध्यक्षता म आज मंत्रालय म राज्य मंत्रिमंडल के बइठका होइस। बइठका म राज्य के घरेलू विद्युत उपभोक्ता मन ल बिजली बिल म छूट देके संगेच कतकोन दूसर बड़े फैसला करे गीस। बइठका के बाद पत्रकार मन ले चर्चा करत उपमुख्यमंत्री अरुण साव ह बतईन कि राज्य के घरेलू विद्युत उपभोक्ता मन ल बिजली बिल म राहत दे बर मुख्यमंत्री ऊर्जा राहत जन अभियान प्रदेस म एक दिसंबर ले लागू हगे हे। एमा छत्तीस लाख घरेलू उपभोक्ता मन ल दू सौ यूनिट हर महीना तक बिजली बिल म पचास प्रतिशत के छूट के फायदा मिलही। ए फायदा चार सौ यूनिटी तक खपत वाले छह लाख उपभोक्ता मन ल मिलही। एखर अलावा राज्य मंत्रिमंडल के बइठका म स्थानीय लघु अउ सूक्ष्म उद्योग ले खरीदी ल प्रोत्साहन दे बर अउ जेम पोर्टल म खरीदी ल आसान करे बर संसोधन करे के फइसला ले गीस। उहें, मंत्रिपरिषद ह छत्तीसगढ़ निजी विश्वविद्यालय स्थापना अउ संचालन संसोधन विधेयक अउ छत्तीसगढ़ दुकान अउ स्थापना संसोधन विधेयक के प्रारूप के घलो अनुमोदन करीन।

## लोकसभा-रेल परियोजना

अंबिकापुर संघरा छत्तीसगढ़ के कतकोन रेल अधोसंरचना ल सृदृढ बनाय बर केन्द्र सरकार डहार ले हाल के बछर म रेल परियोजना ल पूरा करे बर तेजी ले काम करे जावत हे। ए जानकारी आज लोकसभा म सरगुजा सांसद चिंतामणी महाराज डहार ले पूछे गे एक ठन सवाल के जवाब म रेल मंत्री अश्विनी वैष्णव ह दीन। श्री वैष्णव ह बतईन कि अस्सी किलोमीटर लंबा बोरिडांड-अंबिकापुर दोहरीकरण परियोजना म काम सुरु हगे हवय। उहें, अंबिकापुर-रामानुजगंज-बरवाडीह नवा रेललाइन अउ दू सौ बासठ किलोमीटर लंबा रामानुजगंज-गढ़वा रोड सहायक लाइन के परियोजना रिपोर्ट बन गे हवय। अइसने, दू सौ अट्टारह किलोमीटर लंबा सरडेगा-पत्थलगांव-अंबिकापुर नवा रेललाइन परियोजना के रिपोर्ट ल घलो पूरा कर ले गेहे। ओमन बतईन कि हाल के बछर म छत्तीसगढ़ बर रेल बजट आवंटन म बने बढ़ोतरी होय हे।

## एसआईआर-विशेष कार्यक्रम

मतदाता सूची के विशेष गहन पुनरीक्षण अभियान-एसआईआर म प्रादेशिक समाचार एकांश रायपुर डहार ले तैयार करे गे विशेष कार्यक्रम के प्रसारण काली चार दिसंबर के बिहनिया नौ बजके पचपन मिनट ले दस बजे तक करे जाही। ए कार्यक्रम अपलिक म रइही अउ एखर प्रसारण छत्तीसगढ़ के सबो आकाशवाणी केन्द्र मन ह रिले करही।

## हवाई प्रेषण सेवा

रायपुर के स्वामी विवेकानंद विमानतल ले देस के आने-आने सहर बर आउटबाउंड कार्गो सेवा के माध्यम ले डाक तैली के प्रेषण फेर सुरु कर दे गेहे। भारतीय डाक विभाग अउ केन्द्रीय नागरिक उड्डयन मंत्रालय के बीच होय समझौता म ए हवाई प्रेषण सेवा इक्कीस नवंबर ले सुरु करे गेहे।

## क्रिकेट

भारत अउ दक्षिण अफ्रीका के बीच तीन ठन एकदिवसीय क्रिकेट मैच के श्रृंखला के दूसर मैच आज रईपुर के सहीद वीरनारायण सिंह अंतर्राष्ट्रीय क्रिकेट स्टेडियम म खेले जावत हे। दक्षिण अफ्रीका ह टॉस जीतके भारत ल पहिली बल्लेबाजी करे बर आमंत्रित करीस। भारत ह निर्धारित पचास ओवर म पांच विकेट के नुकसान म तीन सौ अंठावन रन बनईस। भारत कोति ले विराट कोहली अउ रितुराज गायकवाड़ ह सानदार बल्लेबाजी करत शतकीय पारी खेतीन। उहें,

कप्तान के.एल. राहुल ह छियासठ रन के योगदान दीन। दक्षिण अफ्रीका कोति ले मार्को यानसन ह दू विकेट लीन। जीत बर मिले तीन सौ अंठावन रन के लक्ष्य के पीछा करत हुए दक्षिण अफ्रीका की टीम ह समाचार लिखे जाय तक पांच ओवर म एक विकेट के नुकसान म 26 रन बना लेहे। भारत फिलहाल श्रृंखला म एक-शून्य ले आगे हवय।

### गांधी शिल्प बाजार

नई दिल्ली के एम्पोरियम कॉम्प्लेक्स म छत्तीसगढ़ हस्तशिल्प विकास बोर्ड डहार ले गांधी शिल्प बाजार हस्तशिल्प प्रदर्शनी के आयोजन करे जावत हे। ए प्रदर्शनी के उद्घाटन काली छत्तीसगढ़ भवन के आवासीय आयुक्त श्रुति सिंह ह करीन। प्रदर्शनी म देस के आने-आने राज्य ले आए सौ झन सिल्यकार मन डहार ले आकर्षक हस्तशिल्प कला, वस्तु अउ कलाकृति के प्रदर्शन एके संघरा करे गे हवय।

\*\*\*\*\*